

Contonschiu la finamira

Cun bunas prestaziuns trasatras eis ei reussiu als tiradurs dalla societad Voluntaria Trun da restar per in ulteriur onn ella ligia naziunala B dil tir cun buis d'aria sin peis silla distanza da 10 m. Ina remarcabla prestaziun ei era reussida alla secunda equipa ch'ei separticipada per l'emprema ga al campinadi dalla 3. ligia.

HANS HUONDER/FMR

Sco en biars auters sports dat ei era in campinadi tiels tiradurs dalla distanza da 10 m. Quel ha liug mintgamai igl unviern ed ei partius en differentas ligias. L'aulta ei la ligia naziunala A, la bassa la 3. ligia. Teams a mintgamai ogt tiradurs ni tiradurs battan in encunter l'auter, ils emprems vegnan promovì en ina ligia pli aulta, ils davos relegai. Mintga team sietta a casa siu program cun 20 siets per tiradur ed en mintga runda ei in'otra squadra da quella gruppa igl adversari. Quei team che contonscha il meglier resultat total survegn dus puncts, tier in remis dat ei in punct.

Fetg bunas prestaziuns

Voluntaria Trun sietta ella secund'aulta ligia svizra, la ligia naziunala B. La promoziun ei vegnida contonschida avon dus onns. Igl unviern 2020/21 ha il campinadi stuiu vegnir interruts pervia dalla pandemia, quest unviern ha el saviu vegnir arranschus cumpleinamein cun siat rundas. Voluntaria Trun culs tiradurs *Annina, Andri, Elena, Nicolas e Gianna Tomaschett, Leandro Petschen, Chris Wolfed Annia Cadalbert* ha contonschiu il sisavel rang final ella gruppa ost. Il trener *Baseli Tomaschett* ei fetg cuntents cullas prestaziuns da siu team: «Cun in tec cletg havessen nus saviu contonscher in punct ni l'auter dapli.



Duas, treis ga havein nus giu empau disletg e havein stuiu schar scriver bass resultats. Sil tschunavel plaz maunca fetg pauc. La finamira da restar ella ligia naziunala B ei denton vegnida contonschida e gliez ei il principal.» Ils resultats totals vegnan alzai il mument surtut dallas excellentas prestaziuns d'Annina Tomaschett ch'appartegn al cader d'elita dalla Federaziun svizra da tir: «Ella sietta ella media 198 da 200 puncts pusseivels. Ils pli bass resultats el team ein 190 puncts, mirau sur tut ora sedat ina media da 192 puncts. Ina buna prestaziun ei era reussida alla secund'equipa da Voluntaria Trun el campinadi dalla 3. ligia. Ella ha contonschiu il quart rang. L'equipa consista da *Hubert e Baseli Tomaschett, Ivan Caduff, Corsin Derungs, Alicia Beer, Chiara Weishaupt, Ella e Giulia Flepp.*

Resultats empermettents

Baseli Tomaschett ei leds ch'igl ei reussiu da scaffir ina secund'equipa: «Aschia havein nus era bunas reservas per l'emprema, en cass ch'enzatgi croda ora. Sche ulteriurs siettan il campinadi ein els el ritmus ed il garant per resultats andants era ella ligia naziunala B. Cun quei secund team savein nus denton era dar la pusseivladad als pli giuvens da sittar regularme in concurrenza.» Voluntaria Trun dumbra il mument 16 activs cun buis e dus cun pistola. La secund'equipa ha saviu vegnir formada era grazia alla participaziun da plirs tiradurs dils Tiradurs sportivs Surselva al campinadi. Ils pli biars activs treneschan duas ga per jamna: «Per



Annina Tomaschett ch'appartegn al cader dalla Federaziun da tir svizra ei il mument la megliera tiradura da Voluntaria Trun.

FOTO MAD

Campinadi grischun a Val S. Pieder

L'emprema fin d'jamna digl avrel han liug ils campinadis grischuns cun buis e pistola silla distanza da 10 m a Val S. Pieder. Quei campinadi era previus la fin da schaner, ha lu denton stuiu vegnir spustaus pervia dalla pandemia. Il venderdis, igl εμπrem d'avrel 2022 vegn sitta il campinadi da gruppas, la sonda, ils 2 d'avrel 2022 la concurrenza singula e dumengia, ils 3 d'avrel 2022 vegn fatg la finiziun cul di da giuventegna e sport.

ordinari vegn sittau lu il program da 60 siets ni era dapli, pia il treidubel dil program da campinadi cun mintgamai 20 siets.» Per la stagiun vegnenta ei Baseli Tomaschett optimists: «Nus quintein danovamein cun in rang el miez dalla tabella dalla ligia naziunala B. Sch'ei schabegia nuot extraordinari duess quei esser pusseivel.» Aspiraziuns silla ligia naziunala A – pia da semesirar cullas ogt meglieras squadras svizas – dat ei buca: «Lu stuessen nus sittar constantamein rundas cun 1550 entochen 1560 puncts, pia diesch entochen 20 puncts dapli ch'ussa. Il mument ei quei strusch realistic.»

Ella qualificaziun pils campinadis svizzers da gruppas cun mintgamai quater tiradurs ni tiradurs ha Voluntaria Trun contonschiu quest unviern il fetg bien 12avel rang.

Al final a Berna ei la fin finala resultau il 15avel rang. Cun Annina, Nicolas, Elena ed Andri Tomaschett ei Trun separticipau cun in fetg giuven team a quei campinadi. El final han 54 gruppas sittau.

Ligia naziunala B, ost

Rangaziun finala: 1. Ebnat-Kappel 1, 6 puncts/10'805; 2. Uster, 5/10'765; 3. Glarnerland 2, 4/10'773; 4. Feld-Meilen 1, 4/10'771; 5. Avry-sur-Matran 1, 4/10'739; 6. Voluntaria Trun 1, 3/10'728; 7. Vaduz, 2/10'714; 8. Cham-Ennetsee 1, 0/10'694.

3. ligia

Rangaziun finala: 1. St-Léonard 1, 7/10'455; 2. Wettigen-Würenlos 2, 6/10'203; 3. Dompierre-Russy, 5/10'007; 4. Voluntaria Trun, 3/9967; 5. Le Crêt-p-Semsaes, 3/9913; 6. Mervelier, 2/9264; 7. Val-de-Ruz, 1/9311; 8. Avry devant Pont, 1/9082.